

Tr. rufa, longitudinaliter dimidiato-infundibuliformis, utrinque lævis, rufa. *Jacqu. Misc. Austr. I. p. 143. t. 14.* — *Schwein. l. c. 1140.* (distinctissimam dicit). *Dubii loci. In ligno putrido. (v. ic.)*

III. NÆMATELIA. Fries

Tremellæ spec. Willd. - Schum. - Pers. Myc. Eur. p. 98. Næmatelia. *Fries in Liljebl. Sv. Fl. (1815). p. Obs. Myc. 2. p. 370.* Encephalium. *Link l. c. 1815. p. 33.* Tremella. *Nees Syn. Gen. p. LXXIV.*

CHAR. Receptaculum gelatinosum, undique fructificans, glabrum, nucleum carnosum compactum heterogeneum includens. Papillæ nullæ. Sporidia in ambitu dispersa, demum emersa, nullis tubulis inclusa. — Forma varia, rotundata, subpulvinata, immarginata, sæpius cum stipitis rudimento, superficie plicata l. gyrosa.

HISTOR. Nomen derivatur a *νεμα* & *ελεω*, obvolvo gelatina, ob nucleum variæ figuræ receptaculo inclusum. Ceterum genus aberrans, medium in Tremellam & valde affinem Dacrymycen, basi radicali, in variis notata, nuclei forma prominente. Nullum vero distinctum receptaculum cupulatum, ut in *Ditiola*, l. clavatum, ut in *Crinula*, formatur. Species paucæ, erumpentes, subradicatæ, firmæ, sat persistentes.

1. *N. encephala*, subsessilis, pulvinata, plicato-rugosa, carneo-pallida, demum fuscens.

Trem. encephala. Willd. in Bot. Mag. I. p. 17. t. 4. f. 14. A. S. p. 301. Schum. Seall. p. 438. Pers. Myc. Eur. p. 98. Næmatel. encephal. *Fries ll. cc.*

Solitaria l. cæspitosa, pulvinato-diformis, 4-6 lin. lata & crassa, (sed habui quoque specimina uncialia), firma. Color in vegetis semper carneo-pallidus, siccus rufofuscus, nucleo magno duro albo, basi stipitiformi. *Ad truncos dejectos pineos & abietinos; etiam Americæ. Autumno - vere. (v. v.)*